

Li Laus



**LAUS
DE
PÈIRE CAUSSE**



Miquèu DESPLANCHES
Felibre Majourau

**LAUS
DE
PÈIRE CAUSSE**
(1921 - 2009)

Cigalo de Buzet o de l'Agout

Santo-Estello di Sànti-Marìo de la Mar

Cigalo de Buzet o de l'Agout

1876

Pau BARBE

(1831-1897)

(demessiounàri en 1884)

1884

Firmin CARLES DE CARBOUNIÈRES

(1824-1903)

1903

Mariò-Louvis DESAZARS DE MONTGAILHARD

(1837-1927)

1927

Jóusè SALVAT

(1889-1972)

1973

Pèire CAUSSE

(1921-2009)

2010

Miquèu DESPLANCHES

Gènto rèino, Segne Capoulié, car counfraire, ami Felibre,

Çai en rèire, fai uno trenteno d'an d'acò, eici, dins la glèiso-fourtaresso, rescountrère, pèr lou proumié cop lou Paire Causse, proche si Santo tant amado au bèu mitan dóu pople gardian e d'un fuble de roumiéu de Prouvènço e de Lengadò. La Prouvidènçi vouguè que vuei, aguènt segui si piado dins l'animacioun e la predicànço dóu roumavage d'òutobre siegue pèr proununcia lou laus de moun davancié à la cigalo de Buzet, o de l'Agout, éu que fuguè tambèn pèr iéu un mèstre, un moudèle, un fraire prèire.

Davans que tout vole me vira devers li Segnouresso d'aquesto terroubre-santo emé Frederi Mistral :

*"O Santo, bèlli mariniero
Qu'avès chausi nòsti sagniero
Pèr i' auboura dins l'èr la tourre e li merlet
De vosto glèiso roussinello,
Coume fara dins sa pinello
Lou marin, quand la mar bacello
Se ié mandas pas lèu voste bon ventoulet "*

(Mirèio, cant XII)

O, permetès au paure marin que siéu de crida assistànço à nòsti gràndi Sànti Mario. Embarca sus lou fréule esquife de moun saupre, me veici davans la grand mar de sciènci de la lengo, tresananto de la douno d'amour e d'engèni de generacioun de Felibre.

Adounc, veici l'ouro de larga lis amarro, e de risca l'aventuro. Fasès boufa voste bon ventoulet, bèlli mariniero, fin que posque, umblamen, faire avans e rejougne la tiero di bon serviciau de la causo mistralenco.

Chascun lou saup : intra au Counsistòri demoro, pèr un Felibre, la supremo ounouranço, mai soulet lou que ié tèn sesiho saup lou pes d'aquest « officium ». E veici, vuei, l'esprovo de la mai grando moudestiò, que la moudestiò, sèmpe duerb li porto de la verita.

Cercant d'entre-signe sus li titulàri de la cigalo de Buzet pèr alesti ma dicho, m'es bèn forço de coustata que lou tèms s'embessouno emé la moudestio pèr amaga l'umblo verita de nòstis esfors. Se lou canounge Salvat marquè pèr sèmpe l'istòri de noste mouvamen, qu pòu, à l'ouro que sian se remembra l'obro d'un Pau Barbe, d'un Firmin Carle de Carbouniero, o d'un Mario-Louvis Desazars de Mount-Gaiard. Sus la telaragno, noun pousquère destousca qu'un Pau Barbe, engeniaire d'elèi, que, emé Alfret Nobel, expandissié l'usanço ... de la dinamito.

Segur, li cigalo soun pas tant brusènto !

Pamens, se la dinamito fai fugi li cigalo, la cansoun restountidouso di Felibre li recato. Liuen dóu chafaret aprefoundèire de civilisacioun, lou cant siau di Felibre se fai bastissèire d'uno fraternita que l'aveni s'en ensouleio. Vaquí, de tout segur, la toco dóu rite de la cigalo d'or.

D'efèt, la fraternita felibrenco passo lou tèms e l'espàci, e descuerb au pople d'O que soun biais de viéure e de s'espreni tèisson uno founso coumunioun drudo d'umanita e pourtarello d'un tresor d'espèr e de sapiènci. Ansin, à la seguido de la cigalo de Buzet o de l'Agout, sian pèr descurbì que, souto lou vèu de la moudestio, banejon d'egrègi mantenèire.

Vole eici gramacia noste rèire Capoulié que sa couneissènço founso de l'istòri dóu Felibrige me permet de redegì 'quèsti rego.

Adounc, espeliguè nosto cigalo en 1876, emé la chausido de Pau Barbe que ié donné lou noum de soun endré de neissènço, proche Toulouso. Òni vuech an pièi, Pau Barbe demessiounè de sa cargo e soun obro s'aprefoundiguè dins lou flume pouderos de la demembranço.

Firmin Carle de Carbouniero, valènt relevaire de la cigalo de l'Agout o de Buzet, en 1884, fuguè Felibre de la proumiero ouro. Conse de Lavau, amavo mai-que-mai sa lengo meiralo e, au bèu soulèu de soun ispiracioun, espeliguèron pousiò e pèço de tiatre dins lou boulegadis felibren de la periodo erouïco. Sendi de la mantenènço d'Aquitani, souto-cabiscòu de l'Escolo Moundino, leissè un souveni

pertoucant de talènt, d'amista e de devouamen. Nosto cigalo quitè Lavau après dès-e-nòuv an de tèms. Mai, amourouso de la cherpo di conse, faguè bello parado sus lou pitre de Mario-Louvis Desazars, marqués de Mount-Gaiard, conse d'Avignounet-dou-Lauragués. Ome d'uno culturo tras qu'alargado, noste majourau èro membre de forço soucieta savènto e publiquè uno tarabastado d'article dins mant uno revisto dou païs toulousen. Rapourtaire di councons annau de l'Acadèmi di Jo Flourau, trevè de longo tóuti li pouèto miejournal. Membre de l'Escolo Moundino, éu tambèn, fuguè elegi majourau en 1903.

Fidèlo à la cièuta moundino, nosto cigalo s'encapelanè en 1927. D'efet, l'abat Salvat, s'endevenguè majourau pèr 45 an de tèms. Quaranto-cinq an de travai achini, pèr l'espandimen de la lengo d'O. Soun obro agrasanto e sa persounalita majestouso leissaran, dins l'istòri de la lengo d'O uno marco que passara li siècle. La tiero de si disciple, embugado de sis ensignamen à l'Istitut Catouli de Toulouso, n'en poudrié parla uno bono passado.

Sèmpe barrularello, nosto gènto cigalo perseguiguè soun camin roumiéu e faguè tancado sus lou pitre de Pèire Causse, uno bello tancado de 36 an. Ansin, pèr lou segound cop, la cigalo de Buzet cantè au bèu soulèu de Diéu l'afougamen dou Felibre e la fervour dou prèire.

Pèire Causse, l'avès, segur, tóuti rescountra o, au plus pau ausi dins si bèlli predicànço. Sa voues tout au cop estoufado e pouderoso vous agouloupavo e soun verbe chanu sabié rejougne li saberu coume lis ilitera. Es d'aquel ome que dève faire lou laus. Coume resumi la drudesso d'uno talo vido sènso trahi lou mistèri d'uno persounalita que sèmpe nous escapara ?

Vaquì perqué me counfise à vosto amistouso indulgènci tout coume à nòsti gràndi Santo que lou counneissien d'à-founs.

Laus tibi ... Petre

A l'ouro que sian, se trato dis ome publi d'un biais sèmpe truffarèu. Li crounicaire truffandié fan l'empèri emé si coumentàri

mouquet. Ansin, lausa quaucun pèr si merite e si vertu pòu parèisse au bèu mai uno usanço vieianchouno e au pieje uno tradicioun ipoucrito.

Mai pèr un ome coume lou Paire Causse, la carreto tirasso lou biòu. Ges de besoun de carga lou fais de l'ipoucrisò pèr faire avans. Sarié desmounta de se vèire ansin lausa, éu tant moudeste e cachous. E se, tout-de-long de sa vido, cantè lou « Laus tibi, Christe » à l'acabado de l'evangèli, ié faudra endura un « Laus tibi, Petre » que, de tout segur, l'aurié enfeta.

Sis iue viéu e bountous se durbiguèron dins l'oustau peirenau lou 23 de janvié de 1921. Quatre ouro de matin picavon au clòuquié de la viloto de Lunèu. La carriero dóu Tapis Verd s'emplenè pèr lou proumié cop de la voues d'un presicaire de trîo : Pèire, Marius, Frutous Causse èro nascu. Soun prenoum tresen, pèr ouriginau que siegue, cargo de sèn dins lou coumplimen de nosto obro coumuno tant fuguè fruchouso la vido de noste bèu counfraire.

Si grand ié parlavon nosto douço lengo e, enfantoun, i'agradavo d'ausi li resson melicous e lóugié dóu parla de sa terro lengadouciano. Trevè l'escolo de soun endré dóu tèms que falié renega sa lengo meiralo. Esperè vuech an la neissènço de sa sorre Jousefino, que ié disien Fifi, e, adeja mestrejavo la colo de si camarado. Abali dins la bello fe crestiano qu'embuguè la culturo nostro, acampavo si sòci pèr ié celebra la messo. E li drouloun, atroupela davans lou pichot autar, barbelavon à l'ausido dóu predicadou. D'efèt, Louvis e Rousalio, si gènt, i'avien croumpa, coume se fasié dins lou tèms, un travestimen de prèire emé tóuti lis eisineto sacrado. Emé l'innocènci de l'enfanço s'oufrissié emé soun Segnour au Paire celestiau. Ansin s'enracinè dins soun èisse lou plus prefound l'esperit d'oublacioun que sèmpre demoro la coundicioun suprèmo de la vido soucialo. Fau bèn marca que l'egouïsme chabi coume receto dóu bonur n'avèn noste proun en vesènt l'abounde de sa frucho.

Tout à-n-un cop voulountàri e liéura à l'apèu de Diéu, lou jouine Pesco-Luno, qu'acò 's l'escais-noum dis abitant de Lunèu, s'embarrà au pichot semenàri de Nosto-Damo de Primo-Coumbo. Lou gran semena dins sa glèiso parrouquialo, la Bono Maire lou faguè crèisse dins soun santuàri gardés. Li paire Lazaristo, que tenien lou coulège fuguèron pèr

éu de moudèle de vido freirenalo, sèmpe pregaréu e soucitous di paure. Ero arresta : sarié prèire e sarié Lazaristo, digne fiéu de sant Vincens de Pau, coume lou fuguè soun ounce, lou Paire Francés Verdier, superiorou generau di Prèire de la Messioun. Que voulès ? Li chin fan pas de cat !

Avié sege an tout bèu just quand, au roumavage felibren de Primo-Coumbo ausiguè pèr lou proumié cop lou majourau-canounge Jousè Salvat que sarié pèr éu un mèstre e un ami car. Li vacanço vengudo, lou jovenome tournavo a Lunèu e, de-longo, restavo à la boulenjarié dóu majourau Louvis Abric. Demié li pan blanc e li pan courtoun, aprenié li finesso de la lengo, éu qu'un jour parlarié prouvençau en partejant lou pan de Diéu. Coume la pasto levant dins la mastro, noste droulas se venguè ome e prouvençau de la costo pleno à la trevanço de l'Escolo dóu Vidourle. Ero lèst pèr felibreja.

Tu es sacerdos in aeternum

Lou pichot semenàri acaba, enreguè lis estúdi de filousoufio e lou nouviciat en òutobre 1940 à Primo-Coumbo dins uno environno poulitico que se capitavo pèr lou mens entrepachouso.

Setèmbre 1944. Uno boufado de liberta escoubeto la Franço e noste novice s'empart pèr Dax mounte coumplis sis estúdi de teoulougio. Mounsegnour Clemens Mathieu, evesque d'Aire e Dax i'impauso li man à Dax lou 27 de mars 1948. Desenant Prèire de la Messioun, se dounara sieissant-un an de tèms pèr l'anóncio de l'evangèli e lou service de la pauriho.

Si superiorou, tre lou mes de juliet, lou mandon à Toulouso pèr larga i plus paure la paraulo dóu Crist. Mai l'Ardecho lou souno pèr óubra au proche di bastidan que vivien liuen de tout. I'agradavo mai-que-mai de rescountra li paure au siéu, que dins soun rode famihié poudien se counfisa sènsò crento. Un cop que i'a, fasié vesito à-n-uno famiho que soun drole malautejavo e fuguè pertouca de vèire si gènt tant soucitous. Bèn talamen que ié venguè mai quàuqui jour après pèr s'entrevà dóu pichot malaut. Li bràvi gènt ié faguèron fèsto. Pensas ! Lou dóutour lis avié rassigura, poudien suspèndre lou tratamen. D'efèt,

lou Paire Causse aremarquè qu'avien bèn pres siuen de pendoula li remèdi au plafoun ! Cinquante an après, n'en risié encaro.

Si qualita umano e esperitalo l'aduguèron pièi à Marsiho ounte restè fin qu'à si darrié jour o gaire se n'en manco. Avié lou pres-fa bèn carguiéu de l'oustalas de Tourre-Santo, qu'es uno grando proupieta di Lazaristo dins li quartié nord. En mai d'acò ié fauguè mena sa messioun encò di caraco car èro l'óumournié di vouiajour di dioucèsi de-z-Ais e de Marsiho. Li voulié counèisse pèr li mies ama e lis aculi coume se déu emé si rouloto au roumavage di Santo dóu mes de mai en particulié. Faguè mirando, bèn talamen que lou faguèron óumournié naciounau di bómian. Counouissié bèn aquéu service de la Glèiso que participè à soun espelido. Quant toumbè de camin à-n-aquelo epoco? Diéu soulet lou saup ! De 1977 à 1983, d'auro en auro fuguè la voues dóu pople vouiajour. Riboun ribagno voulié faire counèisse la culturo, li besoun e lis espèr di bómian e ié pourgi la fe, l'esperanço e l'amour.

Douge an de tèms, fuguè tambèn direitour di Fiho de la Carita à Marsiho, touto voudado i pàuris abandouna de la soucieta. Lis ajudavo de si counsèu gounfle de drudiero umano e esperitalo. Faguè peréu l'acoumpagnado de parèu crestian marsihés dins lou mouvamen dis « Equipes Notre-Dame ». D'annado de tèms ié partejè sa saviesso e soun amista.

Amoureux de la terro

La vido, de Pèire Causse, pèr sa majo part se debanè entre Lengadò, Camargo e Prouvènço. Nascu de Lunèu, terro de bouvino, se sarrè emé naturau de la Nacioun Gardiano. Lou majourau Anfos Arnaud, que n'en faguè soun proun coume capitani, èro, coume lou jouine Causse, de l'Escolo dóu Vidourle. E poudèn pensa que ié baiè la fe di biòu e l'amour di salanc. Se marquè lèu au cartabèu de la Nacioun, aparello seculàri dóu relarg camarguen, de sis us e de sa lengo. Terro mesclado d'aigo e de sau, rode misti i fèris estendudo, Camargo en blanc e negre emé sa cavalino e sa bouvino, mai qu'un país, fuguè pèr Pèire Causse uno passiouun. La preguiero dóu pople de Prouvènço e de Lengadò, en mai de la milenàri tradicioun, aduguè li Sànti Mariò e li

Sants Aposto de Prouvènço eici, en ribo de Camargo. Entira pèr aquéu boufe, lou jouine Causse, dins l'ardènci de si vint an, se capitè un animaire de triò di roumavage de mai e d'òutobre. E ié fuguè fidèu mai de sieissant an. L'avès vist, bessai, celebra la messo di cènt an de la Nacioun Gardiano en 2004 , mai escouten-lou quand jouine messiouàri, dounè l'oumelio pèr lou cinquantenàri de l'Assouciacioun, lou 25 de juliet de 1954 : « ... *A l'ouro d'aro, ounte lou mounde secuta pèr lou nescige dis ome semblo ana au degoulun, à l'ouro d'aro ounte lis acampado di pople se rebalon, sèmpre treboulado, nàutri, gardian, nous fau manteni dins noste cor l'espèr e la gau dóu reviéure. Aquel espèr lou meten pas dins la matèri nimai dins lou prougrès ecounoumi, mai dins lis ome d'ideau qu'an begu à la sorgo pouderouso de la fe e que, testard, volon garda, maugrat lis entrevadis, l'amo caudo e fiero de noste país* ».

En chasque acamp, au mitan d'un revoulun de chivau e d'arlatenco, lou vesiéu saluda chascun em'un èr d'entendemen que tremudavo la moulounado anonimo en uno famiho calourènto. E, benesissènt li chivau, miravo li deviso que n'en counaissié li terro emai li manadié. Alucavo li coulour di gaiardet e semblavo de rounca de la gau coume un camargue sus li sansouiro. Vertadieramen, èro camarguen de cor e d'amo e soun biais pèr tout e jamai es anca dins ma memòri.

L'ami di caraco

Fidèu demié li fidèu, lou vesien i Santo. Eici, èro à l'oustau e la grando famiho bómiano èro la siéuno. Amavo de treva lou pople, e counouissié d'à-founs l'amo populàri, soun bon sèns, si racino e sis espèr. Dóu tèms que lis ideoulougio fasien un chaple dins la soucieta e dins la Glèiso, éu caminavo sus lou meme alen que sis escoutaire dins l'espés de sa vido vidanto. Poudès pas vous amiga emé quaucun dóu n-aut dóu balcoun. Se Jèsu se faguè fraire di malurous, noste messiouàri vouguè freireja 'mé li bómian. Vesié la fe inoucènto d'aquéu pople mespresa. Dóu trefouns de soun amo ié vouguè baia de soulas dins sa misèri pèr lou biais d'uno fe renouvado, maduro, gounflo d'uno

esperanço novo, fundado sus uno souldarieta sènso deco. S'apasiounè pèr li gènt dóu vouiage, coume se dis à l'ouro d'aro. E se dounè à touto rèsto à-n-aquéu pres-fa, tant grèu que siegue. Car n'i'en fauguè de paciènci, de tèms, d'escouto pèr coumprene, ama e servi li bómian coume servié soun Segnour.

Soun carisme dóu rescontre l'adjudè à teissa de liame emé de gènt de touto meno gardant sèmpre pèr amiro de mies servi lou pople bómian. Avié toujours bello ouro dins li caravano, pèr douna la dóutrino is enfant, pèr alesti un batisme o uno ceremounié. Óumournié naciounau se faguè istouriougrafe dóu roumavage de Santo Saro pèr mies coumprene e faire coumprene la devoucioun di bómian. Se faguè etnougrafe pèr estudia lou mudamen espetaclous dóu roumavage dóu mes de mai.

En mai d'acò avié d'adouba li vihado de preguiero dins la glèiso fourtaresso pièi de lis anima. Basto, ié falié prevèire tout ço que se pòu imagina quand un vilage se vèn vilasso assedado de Diéu e de fraternita.

Pèire de Luno

Intravo dins si vint an e trevavo l'Escolo dóu Vidourle à Lunèu, escolo forço vivènto e fegoundo que noun sai. Davans que Pèire Causse devèngue majourau, adeja li cigalo d'or nisejavon à la Vidourlenco : Pèire Azema (cigalo latino -1929), Anfos Arnaud (cigalo de la Mar -1934), Louvis Abric (cigalo de Roussihoun -1936) e Louvis Fourmaud (cigalo d'Aquitani -1942). Quatre cigalo qu'aculiguèron pièi Pèire Causse (cigalo de Buzet o de l'Agout -1973) e, fin finalo Julius Estève (cigalo dis Aupiho -1990). O, vertadieramen l'Escolo dóu Vidourle fuguè e demoro un fougau esbléugissènt de lengo e de culturo. Es de remarco que Pèire Causse n'en devenguè lou cabiscòu d'ounour.

Emé touto uno chourmo d'arderous pres-fachié de soun encontrado lengadouciano, fasié clanti la lengo dins lis acamp, li fèsto e li felibrejado. La Prouvidènci vouguè que, quàuquis annado après la guerro, e messiounàri dins la cièuta moundino, noste jouine Lazaristo se faguè l'escoulan atentièu dóu Majourau-canounge Jòusè Salvat à

l'Istitut Catouli de Toulouso. Es éu, titulàri de la cigalo de Buzet o de l'Agout, que lou peirinejè pèr intra à l'Escòla occitana.

En 1952, rejougnuguè lou Felibrige, e lou vaqui batant l'antifo dins tout lou miejour, semenant de coutrìo la paraulo evangelico e la noblo lengo d'O. Mai li Santo demouravon soun cèntrè, lou nous de soun acioun pastouralo, e la sorgo vivo de sa preguiero. Aproufichavo li roumavage pèr canta dins lis androuno santenco o dins li vihado emé li bóumian. Soun counfraire Lazaristo, lou Paire Pèire Gibert, coumpausavo la musico emé sa guitarro, éu escrivié li paraulo d'aquéli cansoun prouvençalo que d'ùni se n'en souvènon encaro. Faire resclanti nosto rebello lengo, canta sa fe, réjouï sis ami, vaqui lou tout pèr noste valènt mantènèire. Maugrat soun menistèri aclapant, beilejè la coumessioun de la Lengo d'O à la glèiso d'annado de tèms. En 1972, la redacioun finalo de « la Messo en Lengo Nostro » dins la rego dóu councilè Vatican II permetié, enfin, de celebra li Sant Mistèri dins la lengo dóu pople. Chasque cop que, desenant, uno messo se celèbro en lengo d'O, es au Paire Causse que la devèn. Fuguè, pèr la coumessioun, un travai espetaclous que menè emé finesso e erudicioun. Li traducioun fuguèron facho dóu latin, tenènt comte dóu biais prouvençau coume dóu biais ócitan fin que siegue unanimo la preguiero di fidèu. Bono-di soun travai, de milié de roumiéu pousquèron faire siéuno uno lengo liturgico qualitouso óuficialamen reconueigudo de l'episcoupat francés. Emé sis ami dóu Roudelet Felibren dóu Pichoun-Bousquet, publiquè pièi lou « Missau e rituai en Lengo Nostro » en 1976, qu'ansin flouriguèron li batisme, li maridage e li funeraio celebra dins nosto lengo cantadisso. Pèr coumpli soun obro emé la coumessioun de Lengo d'O à la glèiso, lou Paire Causse recampè d'ome e de femo talentous pèr revira en bono e bello lengo prouvençalo lou Missau e lou Leiciounàri di Dimenche e Fèsto. Reviraduro tihouso dóu grè, de l'ebriéu e dóu latin que fuguè uno obro di grosso d'erudicioun e de pastouralo. Travai achini, obro eminènto que se publiquè en 2002 encò dóu Roudelet Felibren dóu Pichoun-Bousquet, de Marsiho, emé l'ajudo devouado de sis ami Pau e Simouno Nòugié. Ansin dins touto la Prouvènço e lou Lengadò, en plaço di traducioun mau-seguro adoubado à la lèsto, poudès aro ausi uno lengo escrinclado e respetouso de si sourgènt escrituràri.

La despartido dóu canounge Salvat leissè ourfanello la cigalo de Buzet en 1972. La fe felibrenco dóu Paire Causse, soun devouamen à la causo mistralenco mai tambèn lou soulide de sa persounalita coume de sa sciènci ié vauguè, pèr la Santo-Estello de Mihau en 1973, soun eleicioun de majourau, eiretié de la cigalo de soun counfraire tant saberu. Ié fuguè remesso lou 21 d'òutobre de 1973 au toubèu dóu Marquès Folco de Baroncelli-Javoun. Ero pèr éu lou signe soulenne de soun estacamen à la terro camarguenço e à sis aparaire e ami de la Nacioun Gardiano. Soun peirin, lou majourau Ravous Arnaud poudié larga : « *Lou majourau Salvat n'aurié pas vougu un autre successour qu'un ome de fe crestiano, de fe felibrenco, plen de voio e de simplicita. Saben que lou Paire Causse caminara dins l'esclargido e que seguira sèmpe li piado de si predecessour dins la causo de l'esperit e li causo dóu cor* ». L'an d'après, lou majorau Causse publiquè lou laus de soun davancié.

Soun pre-fa de majourau n'en faguè un predicaire di fèsto mistralenco à Maiano segur, mai tambèn dins li Santo-Estello ounte sabié mescla la passioun e la sapiènci em'inteligènci e finesso. Es em'aquéu veso que, emé l'abat Morel et l'abat Mouïren, enroutè lou roumavage de la Nacioun Gardiano à Lourdo en 1985. Li roumiéu enfestouli se jognèron i gardian pèr veni à moulounado, bèn talamen qu'en 2010 lou roumavage recampè ùni vue milo persouno. Es à dire la proufeticò vesiou pastouralo dóu Paire Causse.

« **In manus tuas, Domine** »

Coume faire lou tour d'uno vido emplenado que noun sai de carisme e de bounta ?

Pèr depinta 'queste retra dóu majourau Pèire Causse, me fauguè quista chasque endico. Car noste counfraire èro cachous. A la vèio de sa despartido, brulè tóuti si papié, l'obro d'uno vido que noun fuguè pèr éu, coume disié lou Mèstre « *que fum escassamen* ». Amavo de parla, de Diéu, e jamai parlavo d'éu-meme. Sa moudestiò l'aduguè à dire de noun quand fuguè prepausa à la legioun d'ounour que soun ounour èro l'amista di pauras. Lou counaissien pamens coume gai counvivo, que

s'entaulavo voulountié pèr uno manjo goustouso emé sis ami. Car Pèire Causse èro l'ome dis amista duradisso. Sabié proun que, pèr quàuquis un, lou rescontre èro mal-eisa encauso de soun sacerdoti. Mai sa founso bounta, soun biais de moustra d'interès pèr soun contro-istaire gagnavon lou respèt e meme l'amista. Mai que d'un pousquèron n'en tasta la calourènto sabour.

Lou tèms fugissié, mai lou vièi messiouàri malautejant restè fidèu au roumavage di Santo. Segound soun counsèu me faguère marca au Felibrige que soun temouniage de mantenèire m'avié pertouca au founs dóu cor. Celebrè si sieissantò an de sacerdoti à Nosto-Damo de la Gardo. Aqueste jubiléu enluisguè sa caro palinello d'un rai d'eternita.

Pièi, subran, en abriéu 2008, sa voues calè. Sa bello voues qu'avié predica, canta, lausa soun Diéu, sa voues qu'èro, pèr la foulo di roumiéu, la voues di Santo despièi mai de sieissantò an, sa voues s'amoussè tout d'uno. Soun menistèri s'acabè dins lou silènci, sènso pousqué crida sis angouisso o sis espèr. Lou 2 de novèmbre, jour di Defunta, fuguè pèr éu uno meno de mort, leissant Marsiho ounte avié viscu mai de quarante an de tèms pèr se retira à Mount-Óuliéu dins l'oustau Sant-Vincens de Pau ounte prediquè forço retreto àutri-fes.

Lou Capitani de la Nacion Gardiano, noste ami Gui Chaptal, emé quàuqui membre de l'Assouciacion lou venguèron vesita un darrié cop. Ouro drudo d'amista e de partage. Lou camin de sa vido terrestro s'acabè. Lou 20 de jun de 2009, Pèire de Luno nous escapè pèr rejougne l'amour inmenèse dóu Diéu qu'avié tant ama sus la terro, rescontre lumenous e pàsi qu'avié espera vuetanto vuech an.

I'a d'ome que vous laisson regretous, n'i a d'autre que vous laisson arderous. Lou majourau Pèire Causse fuguè d'aquésti. Butè à la rodo coume un bon Felibre e sa voio faguè mirando. Voulèn camina sus si piado e faire coume éu, de touto nosto vido, uno bello douno d'amour : amour di paure, amour de la terro, amour de la lengo, amour de Diéu que se podon pas dessepara. Vaquí bessai lou refrin testard de la cigalo de Buzet. Lou vole pèr sèmpre canta emé mi valènt davancié.

Abat Miquéu Desplanches
Curat-decan de Seloun de Crau